



BRIFF I'R YMGEISYDD

Prif Weithredwr S4C

Cynnwys	Tudalen
1 Cyflwyniad	2
2 Prif Gyfrifoldebau'r Prif Weithredwr	3
3 Sgiliau a Phrofiad y Prif Weithredwr	6
4 Telerau ac Amodau	7
5 Sut i Ymgeisio	7

Cyflwyniad

Mae S4C yn ddarlledwr gwasanaeth cyhoeddus sy'n bodoli i hyrwyddo a hwyluso defnydd o'r iaith Gymraeg. Ein swyddogaeth yw i sbarduno'r diwydiannau creadigol yng Nghymru i greu cynnwys uchelgeisiol ac unigryw sy'n apelio at ddefnyddwyr yr iaith Gymraeg o bob oedran, cefndir a gallu ieithyddol. Nod S4C yw bod yn gyrchfan ar gyfer cynnwys Cymraeg creadigol, gafaelgar a deniadol sydd ar gael i'w fwynhau ar amrywiol lwyfannau yng Nghymru a thu hwnt.

Mae swyddogaeth S4C yn unigryw. Rydym yn comisiynu, creu a dosbarthu cynnwys Cymraeg o ansawdd uchel. Mae S4C yn buddsoddi mewn ac yn ymbweru unigolion a chwmnïau i greu cynnwys apelgar ar gyfer defnyddwyr. Mae creadigrwydd wrth wraidd ein gwaith sy'n cael ei gyflawni drwy gydweithio'n agos gyda'r sector greadigol.

Mae'r ffordd mae defnyddwyr yn ymwneud â chynnwys yn newid yn sylweddol ac mae'n rhaid inni ymateb i'r her. Nawr, yn fwy nag erioed, mae angen i ni adnabod ein cynulleidfâ'n well gan ymateb i'w anghenion a chomisiynu cynnwys yn yr iaith Gymraeg sy'n feiddgar, clyfar, yn cynyddu gwerth ac yn creu argraff.

Un her allweddol i S4C yw denu gwylwyr newydd o'r tu allan i gynulleidfa oedd teledu traddodiadol Cymraeg – gan hyrwyddo amrywiaeth a lluosogrwydd. Credwn fod yr iaith yn perthyn i bawb yng Nghymru, p'un a ydynt yn ei siarad y rhan fwyaf o'r amser, yn achlysurol neu ddim o gwbl. Mae Llywodraeth Cymru wedi gosod targed uchelgeisiol i gynyddu nifer y siaradwyr Cymraeg i 1 miliwn erbyn 2050 ac mae gan S4C rôl hanfodol i'w chwarae o ran helpu i gyflawni hynny.

Mae S4C wedi cyflwyno trefniadau dros-dro er mwyn gweithredu'r argymhellion llywodraethiant o fewn y darpariaethau statudol presennol. Yn hydref 2018, cymeradwyodd y Bwrdd Reolau Sefydlog newydd sy'n rhoi mewn lle'r Bwrdd unedol cysgodol (bydd y Bwrdd unedol cysgodol yn parhau i weithredu nes y bydd deddfwriaeth yn cael ei gyflwyno er mwyn cadarnhau'r newidiadau arfaethedig ac addasu fframwaith llywodraethiant S4C). Mae'r Bwrdd unedol cysgodol yn cynnwys aelodau anweithredol y Bwrdd a benodwyd gan yr Ysgrifennydd Gwladol, ynghyd â'r Prif Weithredwr, y Prif Swyddog Gweithredu a'r Cyfarwyddwr Cynnwys.

Mae rôl Prif Weithredwr S4C yn un sy'n cynnig cyfleoedd unigryw i lunio tirwedd y cyfryngau yng Nghymru a helpu i hyrwyddo'r defnydd o'r Gymraeg. Mae Bwrdd unedol cysgodol yn edrych ymlaen at dderbyn ceisiadau gan ymgeiswyr rhagorol sy'n hyderus yn eu gallu i arwain un o sefydliadau diwylliannol mwyaf deinamig a phwysig Cymru.

Mae'r Sector Creadigol yn mynd drwy newid sylweddol a chyffrous, lle mae dewis yn dominyddu'r farchnad, gyda mwy o gynnwys o ansawdd uchel ar gael gan fwy o ddarparwyr ar amrywiaeth cynyddol o lwyfannau. Mae Darlledwyr Gwasanaeth Cyhoeddus yn cydweithio i gofleidio cyfleoedd ar gyfer partneriaethau a chydweithio, a harneisio'r arloesedd digidol yn y cyfnod newydd hwn o ddarlledu. Darlledu gwasanaeth cyhoeddus yw conglfaen tirwedd cyfryngau'r DU, gan chwarae rôl hollbwysig i sicrhau bod cynulleidfa oedd y DU yn gallu cael gafael ar gynnwys ar draws ystod eang o genres. Mae'r gallu i ddarlledwyr gwasanaeth cyhoeddus addasu ac aros yn berthnasol yn her allweddol. Mae S4C, fel yr unig ddarlledwr Cymraeg, yn sbardun i hyrwyddo'r iaith Gymraeg.

Mae'r iaith Gymraeg yn un o'r ieithoedd byw hynaf yn Ewrop ac mae'n sbardun sylweddol i hunaniaeth Gymreig a Phrydeinig yn yr 21ain ganrif. Mae'n iaith o drafodaeth a dadl ddyddiol, llenyddiaeth gyfoes, busnes, chwaraeon a dathliad cenedlaethol; iaith Cymru drefol a gwledig ar draws cenedlaethau o deuluoedd. Yn greiddiol i bwrpas cyhoeddus unigryw S4C yw'r rôl hanfodol y mae'n ei chwarae o ran cynnal a hyrwyddo'r iaith

Gymraeg, gan adlewyrchu'r diwylliannau amrywiol sy'n defnyddio'r Gymraeg drwy ddarparu cynnwys hygyrch o ansawdd uchel.

PRIF GYFRIFOLDEBAU'R PRIF WEITHREDWR

Y Prif Weithredwr yw llysgennad S4C â chyfrifoldeb sylfaenol am holl weithgareddau S4C. Y Prif Weithredwr sy'n goruchwyllo ac yn rheoli holl agweddau golygyddol, ariannol, strategol a phobol y cwmni. Y Prif Weithredwr sydd yn sylfaenol gyfrifol am gyfeiriad strategol S4C yn ogystal â chreu'r weledigaeth am ei llwyddiant.

Bydd y Prif Weithredwr yn rheolwr gochelgar, yn arweinydd ysbrydoledig a chreadigol. Bydd y Prif Weithredwr yn berchen ar sgiliau rhyngpersonol eithriadol, yn gyfathrebwr naturiol a lefel uchel o ddeallusrwydd emosiynol gyda'r gallu i greu a diwallu datrysiadau arloesol. Hyn oll er mwyn sicrhau bod arlwy aml blatfform S4C yn cyfoethogi ac yn bodloni anghenion ei chynulleidfa.

- Arwain y gwaith parhaus o gyflawni'r argymhellion a nodir yn adolygiad annibynnol S4C. Mae hyn yn cynnwys y rhai sy'n ymwneud â digidol a'r iaith Gymraeg, gan weithio'n agos gyda'r Adran dros Ddigidol, Diwylliant, y Cyfryngau a Chwaraeon (DCMS) i gyflawni'r newidiadau deddfwriaethol angenrheidiol.
- Datblygu strategaethau a chynlluniau uchelgeisiol o ansawdd uchel gan sicrhau eu bod nhw'n cydweddu gydag amcanion byr a hir dymor y cwmni
- Gweithredu fel y Prif Swyddog Cyfrifo a Phrif Olygydd S4C
- Meithrin a chynnal perthnasau cryf â phrif randdeiliaid allweddol, yn seiliedig ar ymddiriedaeth a chydwerth
- Cydweithio'n agos gyda Chadeirydd ac aelodau Bwrdd unedol cysgodol S4C
- Arwain ac ysbrydoli tîm rheoli cryf gyda throsolwg ar berfformiad a lles y gweithlu cyfan
- Arwain gweithgareddau masnachol S4C
- Atgyfnerthu ymlyniad i holl bolisiau mewnol y cwmni

Arwain y gwaith parhaus i gyflawni'r argymhellion a nodir yn yr adolygiad annibynnol o S4C. Mae hyn yn cynnwys y rhai sy'n ymwneud â digidol, y Gymraeg, a gweithio'n agos gyda'r DCMS i gyflawni newidiadau deddfwriaethol angenrheidiol.

- Sicrhau bod gweledigaeth yr adolygiad annibynnol yn cael ei gweithredu ar gyfer trosglwyddo S4C i fod yn endid cwbl ddigidol gan fanteisio'n llawn ar y cyfleoedd a gynigir gan gynhyrchu a dosbarthu digidol.
- Arwain yr ymgysylltiad â Llywodraeth Cymru a sefydliadau partner perthnasol i helpu i hyrwyddo'r defnydd o'r iaith Gymraeg yn unol â strategaeth Cymraeg 2050.
- Darparu cymorth adeiladol i DCMS wrth lunio a chyflawni'r newidiadau deddfwriaethol a gynigir gan yr adolygiad annibynnol o S4C.

Datblygu strategaethau a chynlluniau uchelgeisiol o ansawdd uchel gan sicrhau eu bod nhw'n cydweddu gydag amcanion byr a hir dymor y cwmni.

- Lunio gweledigaeth greadigol amlwg a'r gallu i'w gwireddu.
- Arwain y broses o ddatblygu, sicrhau cymeradwyaeth y Bwrdd, a gweithredu strategaeth y sefydliad ar gyfer y cyfnod hynod gyffrous nesaf a sicrhau bod y sector yn esblygu yn unol â newidiadau'r strategaeth
- Rheolaeth dros holl weithgareddau'r sefydliad gan sicrhau canlyniadau da sy'n gyson â strategaeth a gweledigaeth S4C.
- Mae dealltwriaeth gyflawn o gyfansoddiad cynulleidfa S4C a'i disgwyliadau yn angenrheidiol

Gweithredu fel y Prif Swyddog Cyfrifo a Phrif Olygydd S4C

- Fel y **Prif Swyddog Cyfrifo**, y Prif Weithredwr sy'n gyfrifol am holl weithgareddau cyfrifo S4C ac yn atebol i DCMS am briodoldeb gwariant a rheolaeth arian gyhoeddus.
 - Y Prif Weithredwr sydd â chyfrifoldeb am benderfyniadau ariannol S4C gan gynnwys paratoi'r gyllideb a chynllun busnes hir dymor cyfatebol ar gyfer ei chymeradwyo gan y Bwrdd yn flynyddol.
 - Sicrhau priodoldeb gwariant cyfanswm yr arian cyhoeddus y mae S4C yn ei dderbyn oddi wrth y Ffi Drwydded a DCMS (c. £81m ar gyfer y cyfnod 2021-2022) gan flaenoriaethu'r gwariant a sicrhau arbedion effeithlonrwydd a gwerth am arian cyson.
 - Cynnal perthynas adeiladol gyda'r Swyddfa Archwilio Genedlaethol, fel archwilydd S4C.
 - Monitro systemau asesu risg gan gynnwys cynnal cyfrifoldeb cymdeithasol corfforaethol uchel.
- Fel **Prif Olygydd S4C**, y Prif Weithredwr sydd â chyfrifoldeb dros holl benderfyniadau cynnwys a golygyddol S4C.
 - Sicrhau cydymffurfiaeth cynnwys perthnasol gyda Chod Darlledu Ofcom
 - Sicrhau bod perfformiad gwasanaethau S4C yn cael ei fonitro a'i adrodd yn rheolaidd i'r Bwrdd.

Meithrin a chynnal perthnasau cryf â phrif randdeiliaid allweddol, yn seiliedig ar ymddiriedaeth

- Y Prif Weithredwr yw prif bwynt cyswllt S4C o ran y berthynas gyda DCMS. Mae meithrin perthynas weithiol o'r radd flaenaf gyda swyddogion yr adran hon yn hanfodol ac yn flaenoriaeth i'r Prif Weithredwr. Bydd angen i'r Prif Weithredwr ddatblygu dealltwriaeth o gyd-destun gwleidyddol S4C fel sefydliad a ariennir yn gyhoeddus a gweithio gyda'r DCMS ar y newidiadau deddfwriaethol a argymhellir yn adolygiad annibynnol S4C.
- Y Prif Weithredwr sydd hefyd yn gyfrifol am gynnal a datblygu perthynas S4C gyda'r BBC gan gynnwys monitro a sicrhau bod y cytundeb cydleoli'n gweithio'n effeithiol ac yn parhau'n addas ei bwrpas. Bydd y Prif Weithredwr hefyd yn chwarae rhan allweddol yn sicrhau bod yna gydweithio effeithiol rhwng S4C a'r BBC o ran darpariaeth arlwy rhaglenni i S4C yn unol â'r fframwaith statudol. Yn ogystal, bydd y Prif Weithredwr yn flaenllaw'n annog datblygu prosiectau creadigol newydd gyda'r BBC a phartneriaid eraill.
- Bydd y Prif Weithredwr yn gyfrifol am arwain y broses o ddatblygu perthynas weithiol dda gyda Chadeirydd a Bwrdd S4C gan sicrhau bod gwybodaeth yn cael ei rhannu gydag aelodau'r Bwrdd yn rheolaidd ac yn amserol ar gyfer cyfarfodydd Bwrdd a bod yna ddeialog rhwydd a phwrpasol gyda'r Bwrdd, yn bennaf ond heb ei neilltuo drwy'r Cadeirydd neu Ysgrifennydd y Bwrdd rhwng cyfarfodydd.
- Bydd gan y Prif Weithredwr ran allweddol i'w chwarae mewn cynnal a datblygu enw da S4C gydag ystod ehangach o randdeiliaid hefyd gan gynnwys y sector gynhyrchu yng Nghymru a TAC (Teledwyr Annibynnol Cymru), cynrychiolwyr etholedig yn San Steffan, Senedd Cymru, Ofcom, Cymru Greadigol, y darlledwyr gwasanaeth cyhoeddus eraill a defnyddwyr gwasanaethau S4C ledled Cymru a thu hwnt.

Arwain ac ysbrydoli tîm rheoli cryf gyda throsolwg ar berfformiad a lles y gweithlu cyfan

- Y Prif Weithredwr sydd yn gyfrifol am oruchwylio'r gofal am bobol S4C gan sicrhau lles y gweithlu a sicrhau eu bod nhw'n taro cydbwysedd iachus rhwng gwaith a bywyd personol.
- Blaenoriaeth arall y Prif Weithredwr yw sicrhau bod cyfansoddiad yr Uwch Dîm Rheoli'n gywir ac yn addas ei bwrpas o ran galluogi S4C i gyflawni ei holl amcanion. Mae hyn yn cynnwys sicrhau bod yna sianelau cyfathrebu clir ac effeithiol rhwng aelodau'r Uwch Dîm Rheoli a'r Prif Weithredwr a'r Uwch Dîm Rheoli a'i dimoedd amrywiol.
- Sicrhau bod strwythur staffio priodol yn ei le sy'n galluogi S4C i gyflawni ei gweledigaeth yn bwrpasol ac effeithiol.
- Cynnal gweithlu talentog ac ymroddgar gan sicrhau cyfleoedd priodol ar gyfer hyfforddiant a datblygu gyrfa.

Arwain gweithgareddau masnachol S4C

- Y Prif Weithredwr yw Cadeirydd Bwrdd Masnachol S4C sy'n gyfrifol am strategaeth a gweithgareddau masnachol y sefydliad. Mae'r Bwrdd Masnachol yn cynnwys aelodau anweithredol annibynnol, cyfarwyddwyr anweithredol sy'n cynrychioli Bwrdd S4C ac aelodau sy'n swyddogion gweithredol S4C.
- Bydd disgwyl i'r Prif Weithredwr arwain ar y broses o lunio a gweithredu strategaeth fasnachol i'w chymeradwyo gan Fwrdd S4C, gan gynnwys rheoli buddsoddiadau cyfredol a newydd er mwyn cynyddu incwm hir dymor y gronfa a chynyddu buddsoddiad y gwasanaeth cyhoeddus.
- Mae cynhyrchu refeniw masnachol ystyrlon i ategu cyllid cyhoeddus yn un o swyddogaethau craidd darlledwyr gwasanaeth cyhoeddus diweddar, a bydd disgwyl i'r Prif Weithredwr ddod â menter fasnachol i galon gwasanaethau cyhoeddus S4C wrth iddi gamu i'r gofod digidol.

Atgyfnerthu ymlyniad i holl bolisiau mewnol y sefydliad

- Mae gan y Prif Weithredwr gyfrifoldeb dros hyrwyddo ac atgyfnerthu ymlyniad y gweithlu i holl bolisiau mewnol S4C. Mae hyn yn cynnwys ond heb ei gyfyngu i ddatblygu a hyrwyddo system rheoli perfformiad addas, cydymffurfiaeth â Safonau'r Iaith Gymraeg, materion Iechyd a Diogelwch, Rheoli Data a gweithredu fel y 'Person Cymwys' o ran ceisiadau Rhyddid Gwybodaeth.
- Mae cynyddu amrywiaeth mewn darlledu'n flaenoriaeth i'r sector a rhaid i Brif Weithredwr S4C fynd i'r afael â'r her drwy gydweithio a rhannu arfer da gyda'r darlledwyr a phartïon â diddordeb eraill.
- Cyfrifoldeb y Prif Weithredwr yw sicrhau bod gan S4C amgylchedd gwaith lle mae pawb yn trin ei gilydd gyda pharch a lle mae urddas a thegwch wrth wraidd holl weithgareddau'r cwmni.
- Sicrhau bod cyfathrebu ar draws y sefydliad yn digwydd yn hwylus ac yn agored gan sicrhau gweithlu hapus, ymroddgar a gweithgar.

Ceir rhagor o wybodaeth am wasanaethau, strwythur a materion ariannol S4C yn yr Adroddiad Blynyddol

SGILIAU A PHROFIAD

Sgiliau a phrofiad	Hanfodol	Dymunol
Yn arweinydd naturiol cadarn ac egniol gyda sgiliau rheoli o'r radd flaenaf	✓	
Profiad o arwain cwmni neu sefydliad a/neu weithio yn y diwydiannau creadigol		✓
Sgiliau cyfathrebu naturiol, gwych, yn ysgrifenedig ac ar lafar, yn Gymraeg a Saesneg gyda'r gallu i uniaethu gydag unigolion ar bob lefel	✓	
Dealltwriaeth drwyadl o swyddogaeth S4C	✓	
Trac record brofedig o lunio a gweithredu strategaethau clir, uchelgeisiol a llwyddiannus	✓	
Profiad eang o feithrin perthnasau cryf gydag ystod eang o randdeiliaid ar lefel uwch.	✓	
Profiad o gydweithio gyda Bwrdd a strwythurau a gofynion ymarfer da o ran llywodraethu corfforaethol	✓	
Sgiliau rhyngbersonol eithriadol gyda lefel uchel o ddeallusrwydd emosiynol		✓
Meddwl craff a chreadigol gyda'r gallu i ddadansoddi sefyllfaoedd cymhleth gan greu a diwallu datrysiadau arloesol		✓
Dealltwriaeth eang o'r dirwedd gyfryngol yng Nghymru a thu hwnt gan gynnwys y datblygiadau diweddaraf a'r heriau		✓
Dealltwriaeth o'r goblygiadau o fod yn Brif Swyddog Cyfrifo	✓	
Dealltwriaeth o'r fframwaith/ gofynion rheoleiddiol a'r cyfrifoldebau sydd ynghlwm o fod yn Brif Olygydd S4C	✓	
Profiad o weithio ym myd busnes neu o fewn y cyfryngau digidol		✓
Ymwybyddiaeth o saith egwyddor bywyd cyhoeddus a'u pwrpas	✓	

Telerau ac Amodau

Lleoliad:

Lleoliad arferol eich gwaith fydd Canolfan S4C yr Egin, Heol y Coleg, Caerfyrddin SA31 3EQ ond disgwylir i chi deithio i le bynnag y bydd S4C yn rhesymol yn ei orchymyn.

Rydym yn annog pob cyflogai i gael cydbwysedd iach rhwng bywyd a gwaith ac yn cynnig trefniadau gweithio hyblyg, megis gweithio ystwyth, ynghyd ag ystod eang o batrymau gwaith gwahanol. Mae pob un ohonynt yn amodol ar anghenion busnes

Cyflog a Buddion:

Yn gymesur â swyddogaeth a phrofiad yr ymgeisydd llwyddiannus. Nid yw S4C yn cynnig unrhyw fath o dâl sy'n gysylltiedig â pherfformiad na thaliadau uwch, lwfans car na darpariaethau Yswiriant Iechyd.

Y cytundeb a'r amodau cyffredinol i'w trafod â'r ymgeisydd llwyddiannus.

Er gwybodaeth, mae amodau cyffredinol S4C ar gyfer cyflogaion fel a ganlyn:

Mae pob aelod o staff S4C yn derbyn gwerthusiad blynyddol gan ei reolwr llinell. Yn achos y Prif Weithredwr, y Cadeirydd a Chadeirydd y Pwyllgor Archwilio a Materion Cyffredinol sy'n gyfrifol am hyn.

Oriau swyddfa arferol S4C yw rhwng 9.00am a 5.15pm, o ddydd Llun i ddydd Iau, a rhwng 9.00am a 4.45pm ddydd Gwener. (Oherwydd natur y swydd bydd angen peth hyblygrwydd yn achlysurol.

Byddai cyflog y swydd yn ystyried unrhyw oramsfer rhesymol y gallai fod yn ofynnol i chi ei weithio)

Yn ogystal â gwyliau banc statudol bydd gennych hawl i 26 diwrnod o wyliau â thâl bob blwyddyn, a bydd y flwyddyn honno yn cychwyn ar ddyddiad dechrau eich cyflogaeth gydag S4C. Ar ôl cwblhau 5 mlynedd o wasanaeth byddwch yn cronni 2 ddiwrnod ychwanegol o wyliau yn ogystal ag 1 diwrnod ychwanegol o wyliau bob blwyddyn ar ôl hynny hyd at uchafswm o 32 o ddiwrnodau bob blwyddyn ar ôl 9 mlynedd o wasanaeth.

Bydd gennych hawl i ymuno â Chynllun Pensiwn Personol Grŵp yn unol â rheolau Cynllun o'r fath, a gaiff eu diwygio o bryd i'w gilydd. Pe byddech yn ymuno â'r cynllun, byddai S4C yn cyfrannu 10% o'ch cyflog sylfaenol tuag at y Cynllun hwn a byddai disgwyl i chi gyfrannu 5%.

Caiff aelodau staff S4C eu cynnwys yn awtomatig yng Nghynllun Marwolaeth mewn Gwasanaeth S4C (ac S4C sy'n talu'r costau).

Sut i Ymgeisio

Am sgwrs anffurfiol a manylion pellach, cysylltwch â thîm Goodson Thomas team ar info@goodsonthomas.com neu 02921 674422. Os am wneud cais, ewch i <https://www.goodsonthomas.com/opportunities> gan nodi 0328-GT-S4C yn y llinell pwnc gan atodi CV a llythyr eglurhaol. Bydd pob cais yn cael ei gydnabod.